

# 廣東歷代詩僧簡介（十三）

慧光居士

## 今竹

今竹字俱非，湖廣人，由行伍得度，投天老人受具，初不識字，久之能誦梵典，踰年，知書握管，成文皆有至理。充海幢典客，禮數優嫺，被服若出儒素。頃侍老人居丹霞，精研道妙，後奉命居長慶，嚴修梵行，爲紳士所傾仰，老年坐化怡山。

## 龍護園書事

紅梅峻嶺臨官路。一路菴藺半編戶。往日精嚴舍衛城。鉢和羅底今非故。我行挂錫龍護園。三四殘僧面如土。自言十載被兵戈。烟火萬家多散去。從來五施藉檀門。此度艱難豈相顧。饑寒不免自銷歸。法鼓梵鐘仍早暮。關頭奈是往來衝。責望多般少回互。盡道使君曾立租。僧糧一石何曾富。秋成僅收二十鍾。費錢二千入官庫。幸然得豁雜差徭。不致流離仗仁恕。我聞此語心酸悽。相對吁嗟手無措。寫憂聊出北門行。頽垣破瓦籠荒霧。飛飛歸燕掠空堂。處處寒池立饑鷺。

## 望長老峰

山中長老何年住。寶髻雲衣自朝暮。佛性能通石點頭。我來瞻仰如回顧。飛花片片打頭來。豎指空中灑香雨。揚眉挺脊坐枯禪。豈亦尙參無味句。月掛長松照舉頭。莊嚴妙相端然具。丹嶠諸峯盡屈從。此中應有人天聚。

## 送衣上人

昨日來丹霞。今朝問水程。言尋臨海寺。別我暮雲生。夜月窺禪定。寒松引梵聲。何當由去住。千里杖頭輕。

## 秋桐

嚴霜吹木葉。一夜冷梧桐。帶月飄金井。和雲墜石叢。聲乾喧過鹿。色老覆清蟲。爲報來巢鳳。疏枝在太空。

## 三峽澗底回望五老百花諸峯

欲把棲賢當畫縣。不辭攀險下前川。瀑經石齒看飛雨。橋跨屏頭低遠天。五老帶雲從竇出。百花如錦枕崖眠。軍持歸探深溪底。半斗斜傾一縷烟。

## 羅浮蝴蝶

五色翩翩宿露叢。無心長自泊西東。雲間欲掩仙人扇。花下寧羈翡翠籠。身染烟霞時出谷。翼彰文彩欲乘風。相看不是籬邊物。宜與莊周羽化同。

陳顛菴先生讀俱非詩絕句：放下屠刀識字初。打頭香雨灑空虛。詩心豈有天人引。不外精勤讀梵書。

## 今身

今身字非身，新會邑諸生，族姓劉，原名彥梅，嗜學好古，善鼓琴，不受俗羈，稟世雄氏之教。戊申棄諸生，登具丹霞，侍天老人於歸宗。晚隱蒼梧龍化七寺，多致儒紳之慕，凡經其指授者，皆知向上一大事。甲戌示寂，其所度白衣弟子思其遺範，於所居七寺繪影事之。

## 別黎慧劍

意氣生平重。其如此夕何。世難知己少。時亂一身多。別路蟲聲切。長江鶴唳和。莫辭他日晤。千里遠相過。

## 送陳長卿還閩

寒林蕭瑟動離愁。落日那堪送舊遊。千里遠來披野雪。一冬歸去逐沙鷗。山烟片片迎征騎。梅雨霏霏點客舟。自後欲知重過晤。南臺深處一丹邱。

題野人山莊

編茅築屋枕溪旁。半畝桑麻半畝篁。弄石老猿通野語。帶雲歸鶴唳清商。窗臨碧澗爐添火。門掩寒巖篔自涼。

白髮山翁歌白雪。疏林寒月落橫塘。

陳顥菴先生讀非身詩絕句：世運艱危知己稀。時逢喪亂一身微。詩聲淒斷蒼梧月。時帶琴音逐雁飛。

今 竟

今竟字汝安、錢塘陸氏，俗名圻，字麗京，一字景宣，學者稱講山先生。少舉貢士，與弟培并負盛名，結友爲登樓社，稱西陵體。乙酉之難，培里居自經死，竟匿海濱，尋至越中，復至福州，薙髮爲僧，名法龍，字誰菴。母作書趣之歸，時竟尙崎嶇兵甲間，思得一當，事去乃返。雅善醫，遂藉以養親，所驗甚多，吳越之間，爭求講山治疾。會莊鑑之事發，刑部當大逆，詞連竟與查繼佐范驥三人，械繫按察司獄，久之事白，詔釋之，乃入黃山學道。子寅聞之，徒步入山，長跪號泣請歸。竟曰昔者所以歸，以汝大母在，今何所歸。寅請一祭墓，乃從之歸。會弟培苦心痛，他醫治甚益。不得已留治八月餘，與弟同室臥，終不入內。既愈遂入粵謁天然師於丹霞，爲易名受具，使掌書記。贈以詩云：脫卸黃冠著錦爛。還丹誤服得童顏。真人未必居蓬島。藥草終須到雪山。剩有君臣紹洞上。更無文字到人間。才華洗盡看南斗。莫學黃龍在泐潭。時康熙九年庚戌，竟年五十七。一夕遁去，莫能蹤跡，寅往來萬里，負零丁求數歲，卒不可得，以是悵悵死，人稱其孝。

望遠曲

東鄰艷質早知名。到得藍橋近玉京。天上白蜍看竊藥。

人間紅豆已傳情。胡姬獨有爐堪傍。名士慚無國與傾。

好待三春花月夜。渡頭桃葉隔江迎。

與歌者陳郎

落日橫江老白蘋。同鄉停問一相親。未嫌李尉翻新曲。偏喜何戡是舊人。玉管漫吹秋月白。紅牙曾對倚筵新。坐中恐有傷心客。莫按伊涼水調頻。

陳顥菴先生讀汝安詩絕句：紅豆傳情望京闕。玉簫吹月厭伊涼。倚爐瀟瀟落慚名士。顧曲蒼茫戀此鄉。不問人間借姓名。天憐孝窟戶幽局。閒吟散髮山樓賦。超上當年七子聲。（錢塘張坡效青同麗京諸子集雲居山樓云：高齋落葉幾經秋。散髮閒吟次第遊。草樹常依寒雨徑。江濤偏撼夕陽樓。青尊晚動幽人興。白雪羣推大雅流。遙憶文通還有賦。平原一望使人愁。太倉郁植東堂贈麗京云：飛章北寺正縱橫。百口牽連頌繫輕。爲告鄭虔曾撰史。豈知高允竟全生。皇天有意憐忠孝。人世無端借姓名。合浦未歸西市去。暮雲回首總傷情。見詩觀。）無窮易義古囊間。子子孫孫蝨螽繁。閉體緇黃無不可。丹霞洞又太和山。（曝書亭集六十一有零丁爲陸進士寅作云：寅也敬白零丁尺半紙。敢告行路諸君子。有父有父一去故鄉不知幾千里。日月逾邁二十五年矣。請說軀體顏面皮。軒眉廣額豐兩頤。口輔鬚鬚微有髭。去時牡齒尙未落。肩脾頗亦肥。平生不怒多笑嬉。目無斜視頭無棋。周尺一尋長過之。請說裳衣少新製。大布寬袍。淚常漬帶。斷續繩衫裹臂。孫孫子子蠶蟲萃。有時捫之擲在地。兩褶敝袴雙足屣。寒肌生栗暑生痱。婆留鄉語聽易分。問以經術辭紛綸。至若說易尤專門。方州部家味。易義根囊中。口譜可等金匱文。方不自秘恆活人。不昧財。不逐禍。緇衣黃冠無不可。惠而能以消息聞。爲德者君報者我。蓋麗京論釋後，游嶺南，依金堡丹霞精舍，一夕夢至琳宮，丹梯碧瓦中有神建龜蛇之旒。寤對寺僧言狀，僧楚人謂曰此太和山也。先生乃易道士衣往訪，竟不知所終。子寅字冠周，康熙二十七年進士，既釋褐，微服往求。竹垞效東漢戴良體，代作零丁一篇授之，持以入楚云。）

（未完）